

Du ju spiek Englisch?

Günter Mannweiler

Viel Pälzer honn, des is bekonnt,
ehr Glick gesucht im ferne Lond.
Sinn niwwer no Amerika
un honn dort Worzele geschlaa.
Un schnell, wie Pälzer halt mo sinn,
do hatten se es Englisch drin.

Jetzt schicken die vun driwwe als
e Haufe Ausdruck in die Palz.
Geh nor mol onne in die Stadt
un heer der oo es Pälzer Platt:

Die Blumme gäbt's im **Flowershop**,
de **Hairstyler** macht uns de Kobb.
Mer nämmt e **Drink** als gee de Dorscht
un saat **Hot Dog** zur Kohlerworscht.

Salatsoß hääbt jetzt **Dressing** bloß,
e **Big Mac** is e Weck, gonz groß,
mit Hackflääsch, frisch vum **Barbecue**;
e Portion **Ketchup** gäbt's dezu.

Es werd om Gelterswoog **gebruncht**
oder beim **Burger King geluncht**.

Die **City** is um's Hertie rum,
wo's Plaschder babbt vor **Bubble Gum**.
Zur **Rush Hour** geht's alsemo
zur Aawet nor mit **Stop and Go**.

Wer **Power** hat, steht gut im Saft;
wer **jobbt**, net regelmäßig schafft.
Wer **happy** fiehlt, der fräät sich als,
wer **down** is, hot Maleer om Hals.
Wer **high** erumlauft, hot gesoff,
wer **'Hi'** saat, hot Bekonnte 'troff.

Mer werd **gelifft**, **gestylt**, **gedresst**,
mer is **relaxed** oder **gestresst**.

So sprecht mer heit halt in de Stadt.
Mer heert's uff Schritt un Tritt.
So klingt heit unser Pälzer Platt.
Aa, wer net will, muss mit.
Sunscht is er nimmi **up to date**.
Doch bass nor uff, sunscht is' zu spät:

Donn sprechen meer om' schääne Daa
wie driwwe in Amerika!

